

Stòri da rìsc

Ai temp che s'evi ammò un bagai  
mi pai castegn andavi matt  
e tapasciavi a 'ndà cercai  
cun vùn che fava ul maronatt.

Par mi l'eva un pozz da scienza  
cun tanti ann fai a Parìs:  
vùn che 'l g'ha tanta esperienza  
al fa pesà i rob che 'l dīs.

Al m'ha dii che la castegna  
la sa tegn ben difendüda;  
se la ciàpat la ta segna  
cun 'na quei bèla spungiüda.

I è frütt, al dīs, cume i tusann,  
se ta fett tant d'andàgh visìn;  
mi che hu prövaat par tanti ann  
sum sempru ammò tütt pien da spìn.

Quand sarett grand fa pö atenzion,  
al m'ha dii ammò: ti resta squisc,  
e pensa pö in di ucazion  
che ogni frütt al g'ha ul sò rìsc.

L'ha cagnaa un labbru e l'ha tasüü  
credendo che ga davi a trà,  
ma mi hu pensaa che l'ha vörüü  
scascià un magón da la sua età.

A lü hu pensaat dopu in di ann  
quand par amur quasi sa möör,  
e hu capii che cui tusann  
sa dev riüscì a 'ndà in fund al cöör.

L'è stai assee par spiegàm tütt,  
e l'è inscì che hu pö imparaa  
che sa pö anca avegh ul frütt,  
però se ul rìsc l'è mia seraa.

G'hu dii in 'sti dì a un nevúd grand  
che se al g'ha in ment d'andà a cercà  
al sarà mei che 'l dòpra i quant  
par mia avegh dīt da medegà.

Nono! al ma fà, è passaa i ann,  
'dèss mi ormai a sum espèrt:  
se vu in piazza giò a Lügàn  
a trövi i rìsc già bei e vèrt!

